

ՍՊԻՐԻԴՈՆ ՄԵԼԻՔՅԱՆ  
(Մենդյան 100-ամյակի առթիվ)

Ա. Գ. ԹԱԴԵՎՈՍՅԱՆ

Կոմիտասի ավագ աշակերտը՝ Սպիրիդոն Մելիքյանը, այս դարասկզբին սուպարեզ մտած այն ականավոր երաժիշտներից է, որ իր բազմակողմանի գործունեությամբ ծառայել է հայ պրոֆեսիոնալ երաժշտության նոր խնդիրների լուծմանը:

Կարա Մուրզայի, Եկմալյանի, Կոմիտասի օրինակով Մելիքյանը իր ստեղծագործական ուժերը ի հայտ բերեց երաժշտական ամենատարբեր ոլորտներում, լայն ճանաչման արժանանալով հայ իրականության մեջ որպես խմբավար և ազգագրագետ, երաժշտական տեսաբան և կոմպոզիտոր, մանկավարժ և հասարակական գործիչ: Մելիքյանին մշտապես հետաքրքրել են հայ երաժշտության պատմության և տեսության պրոբլեմները, երաժշտական ֆոլկլորի հավաքումը, ձայնագրումը և ուսումնասիրությունը: Առանձնապես մեծ է եղել նրա վաստակը հայ երաժշտական ազգագրության սուպարեզում: Այդ են վկայում նրա թողած ազգագրական ժողովածուները, որ բովանդակում են հինավուրց ավանդույթներ ունեցող հայ ժողովրդական երաժշտության տարբեր ժանրերը ներկայացնող հետաքրքրական և արժեքավոր զբաղումներ: Մելիքյանը անսպառ եռանդով նվիրվել է երաժշտական կրթության ու լուսավորության տարածմանը, եղել է ժամանակի ամենահմուտ խմբավարներից մեկը, որ հիանալիորեն յուրացրել էր Կոմիտասի կատարողական ավանդույթները: Արտակարգ բեղմնավոր էին Մելիքյանի կյանքի վերջին տարիները, որ անցան Սովետական Հայաստանի մայրաքաղաքում: Նա մեր երիտասարդ հանրապետության կուլտուրայի ամենաժրջան ուժերից էր, որ գործուն մասնակցություն ուներ օրեցօր ծավալվող սովետահայ երաժշտական կյանքին:

Սպիրիդոն Ավետիսի Մելիքյանը ծնվել է էջմիածնում, 1880 թ. դեկտեմբերի 1-ին (հին տոմարով նոյեմբերի 18-ին), ուսուցչի ընտանիքում: Դեռևս վաղ մանկության տարիներին նա զրկվում է ծնողներից, ապրում հորեղբոր և մորեղբոր խնամքի տակ: Տասներեք տարեկան Սպիրիդոնը դառնում է Գևորգյան ճեմարանի սան և իր երաժշտական ընդունակությունների շնորհիվ արժանանում ճեմարանի երգեցողության ուսուցչի ու խմբավարի՝ մեծ Կոմիտասի ուղադրությանը: Շատ շուտով նա տիրապետում է նոտագրությանը, ուսման մեջ աչքի ընկնում արտակարգ առաջադիմությամբ: Երաժշտական ձիրքով օժտված աշխատասեր ու պարկեշտ պատանին դառնում է Կոմիտասի ամենասիրելի աշակերտը:

Վերհիշելով այդ տարիները, Սպիրիդոնի գասրնկերներից մեկը, ճանաչված մանկավարժ Սիմակ Սահակյանը հետևյալն է գրել. «Սպիրիդոն Մելիքյանին ճանաչում էի 1895 թվականից, երբ նույն դասարանի աշակերտներ էինք Գևորգյան ճեմարանում: Սպիրիդոնը լիքը մարմնով, միջահասակ, լայնաթի-

կունք, տափակ դեմքով մի պատանի էր: Ես և Սպիրիդոնը մտերիմ էինք, լավ էինք հասկանում միմյանց: Ես թեև անմշակ, բայց կոպիտ և ուժեղ ձայն ունեի, իսկ Սպիրիդոնը շատ մեղմ, դուրեկան և քնքուշ ձայն ունեի: Նա թե՛ ազգային-ժողովրդական երգեր, թե՛ շարականներ, շատ լավ էր երգում և 5-րդ դասարանից սկսած դասապետ էր, այսինքն աշակերտական այն խմբի ղեկավարը, որ եկեղեցու մի դասում երգում էր եկեղեցական բոլոր երգերը: Զարմանալի համեստ ու ընկերասեր էր նա. աշխատասեր, համբերատար: Նրա աշխարհը երգն ու երաժշտությունն էր: 1899 թը վականին, երբ արտասահմանից վերադարձավ Կոմիտասը, մեր Սպիրիդոնի աստղը պայծառացավ. ոչ միայն նա, այլ ամենքս հասկացանք, որ մեր ընկերը մեծ շնորհքի տեր է և ապագա աչքի ընկնող երաժիշտ»<sup>1</sup>:

Սպիրիդոն Մելիքյանի՝ ասպագա երաժշտի ձևավորման վրա Կոմիտասը մեծ ազդեցություն է ունեցել: Դեռևս ուսման տարիներին Սպիրիդոնն սկսում է իր ուսուցչի օրինակով ղրաղվել ժողովրդական երգերի ձայնազրամբ, այդ նպատակով արձակուրդի ամիսներն անցկացնելով էջմիածնի և Ապարանի գյուղերում: Կոմիտասը ուշուշով հետևել է իր շնորհալի սանի ընդհանուր և մասնագիտական առաջադիմությունը, նրա գլխիքների հարստացմանը, ճաշակի դարգացմանը, աջակցել նրան՝ յուրացնելու խմբավարական արվեստի առանձնահատկություններն ու բազում գաղտնիքները:



1902 թ. Մելիքյանն ավարտում է ճեմարանի դասընթացը, ստանալով սարկավագի հոգևոր կոչում, այստեղ էլ նա նշանակվում է երգեցողության ուսուցիչ և միաժամանակ դառնում Կոմիտասի օգնականը (ասիստենտը) ճեմարանական երգչախմբում: Երկու տարի ճեմարանում աշխատելուց հետո Մելիքյանը Ղուկասյան կտակի հաշվին մեկնում է Բեռլին՝ երաժշտական բարձրագույն կրթություն ստանալու: Այդ գաղափարը հղացել էր Կոմիտասը, որ մտահոգված էր իր աշակերտի մասնագիտական հետագա կատարելագործման հարցով: Սակայն Կոմիտասը նախագգուշացնում էր նրան, որ շտարվի գերմանական երաժշտագիտության ասպարեզում գոյություն ունեցող սխոլաստիկ ուղղություններով: Հենց այդ նպատակով է, որ նա իր աշակերտին է տրամադրում հայ ժողովրդական երգերի իր ստվար ժողովածուն՝ արտազրելու և հետը վերցնելու համար: Կոմիտասյան ժողովածուն այն հավաստի ու հարուզատ աղբյուրն էր, որից մշտապես օգտվելով, երիտասարդ Մելիքյանը պիտի կարողանար ճիշտ կողմնորոշվել իր ստեղծագործական և գիտաուսումնասիրա-

<sup>1</sup> Սպիրիդոն Մելիքյան, Հողվածներ, հուշեր, նամակներ, փաստաթղթեր, Երևան, 1964, էջ 71—72:

կան որոնումներում: Ինչպես հայտնի է, կոմիտասյան հիշյալ հազվագյուտ ժողովածուն պահպանվել է հենց Մելիքյանի ջանքերով: Ըստ արտագրված օրինակի այն հրատարակվեց 1931-ին՝ Մելիքյանի առաջաբանով:

Բեռլինում Մելիքյանը հետզհետե խորացնում է իր երաժշտատեսական գիտելիքները, ուսումնասիրում հին ու նոր երաժշտության պատմությունը, շարունակում է մշակել իր ձայնը և հմտանալ խմբավարական արվեստում: Կոմպոզիցիայի գծով նա աշակերտում է Ռ. Շմիդտին, երաժշտության պատմության գծով՝ Օ. Ֆլայշերին և Հ. Կրեչմարին, իսկ խմբավարության գծով՝ Զ. Օքսին: Որպես ավարտական աշխատանք Մելիքյանը ներկայացնում է «Ախթամար» վոկալ-սիմֆոնիկ պոեմը՝ գրված խառն երգչախմբի և սիմֆոնիկ նվագախմբի համար, ըստ Հ. Թումանյանի համանուն լեգենդի:

Հայրենիք վերադառնալով երաժշտական-մասնագիտական գիտելիքներով զինված, Մելիքյանը որոշում է ամբողջապես նվիրվել երաժշտական ասպարեզին և ընդմիջտ խզել իր կապերը եկեղեցու հետ: Գ. Սուրենյանին ուղղված իր դիմումում նա հրաժարվում է սարկավազի հոգևոր կոչումից: Դա մի համարձակ քայլ էր այն ժամանակվա պայմաններում, որ արտացոլում էր հայ երիտասարդի հայացքներում և աշխարհըմբռնման մեջ առաջ եկած խոր բեկումը: Մելիքյանի այդ հրաժարական դիմումում ասված է. «Մոտ շորս տարի արտասահմանում երաժշտական արվեստի մեջ կատարելագործվելուց հետո այժմ ինձ համար անկարելի է դառնում կրկին վանք վերադառնալ իբրև կուսակրոն հոգևորական: Դեռ 21 տարին շրայած, մի հասակում, երբ դեռ կյանքն ու աշխարհն իր բարիքներով անծանոթ էր ինձ, ես մի ահավոր ուխտ ուխտեցի, մի հանդուգն անձնագործությանը. ուխտեցի արհամարհել աշխարհը իր բարիքներով, քամահրեցի սրբազան սերը և նահատակի մի անուն առած, ճգնավորի վերարկուն հագած, վանք քաշվեցի՝ նրան նվիրվելու համար:

Այժմ, սրբազան հայր, իրերը բոլորովին կերպարանափոխվել են, որովհետև ինքս այժմ այլ կերպ եմ տեսնում և այլ կերպ դատում, քան սյն ժամանակ... Ես ստիպված եմ հենց այժմվանից թողնել այդ կյանքը և մի նոր կյանք սրտնել, մանավանդ, որ իմ լինել-չլինելը հոգևոր դասի համար մի առանձին նշանակություն չունի: Ես միայն և միայն երաժշտությամբ պիտի զբաղվեմ»<sup>2</sup>:

Էջմիածինը հալածանք սկսեց Մելիքյանի դեմ, նրան համարելով դավաճան: Ի վերջո մայր աթոռը Մելիքյանին ազատ համարեց սարկավազությունից և որոշում ընդունեց մաս-մաս ետ գանձել նրանից այն ամբողջ գումարը, որ հատկացվել էր արտասահմանյան ուսումնառության ընթացքում:

1909 թ. Մելիքյանը հաստատվում է Թիֆլիսում՝ դառնալով Ներսիսյան դպրոցի երաժշտության ուսուցիչ և խմբավար: Նույն թվականին Թիֆլիսում լույս է տեսնում Մելիքյանի գրքույկը՝ «Երաժշտության զարգացման խնդիրը մեզանում», որտեղ հեղինակը անդրադառնում է հայ պրոֆեսիոնալ երաժշտության վիճակին և զարգացման հեռանկարներին, հայրենի երգարվեստի սարածման հարցերին, աճող սերնդի երաժշտական դաստիարակության պրոբլեմներին: Այստեղ Մելիքյանը հատկապես նշում է, որ դպրոցական ծրագրերում հայ ժողովրդական երգին արժանի տեղ պետք է հատկացվի: Նա գտնում է, որ ժողովրդական երգարվեստի նմուշների միջոցով կարելի կլինի ճիշտ հունով զարգացնել մանկան երաժշտական լսողությունը և ունակությունները:

<sup>2</sup> Նույն տեղում, էջ 182:

Մելիքյանն այնուհետև առաջ է քաշում երաժշտական ընկերությունների և դրանց կից երգչախմբերի ստեղծման անհրաժեշտության հարցը:

Հայ երաժշտական կյանքի ինտենսիվացման այդ ծրագրից էր բխում նաև Մելիքյանի կարևոր նախաձեռնությունը՝ Թիֆլիսի հայոց երաժշտական ընկերության կազմակերպումը 1912 թ.: Մինչ այդ Թիֆլիսում գոյություն ուներ այսպես կոչված «երաժշտական լիգան», որ գործեց մոտավորապես 3 տարի (1908—1910 թթ.): Սակայն նրա ղեկավարի՝ Ռոմանոս Մելիքյանի Պետերբուրգ մեկնելուց հետո լիգան շուտով իր աշխատանքը դադարեցրեց: Թիֆլիսի հայոց երաժշտական ընկերության ստեղծումը, այսպիսով, հասունացած հարց էր: Նրա նախաձեռնողների թվում էին, բացի Ս. Մելիքյանից, Մ. Միրզոյանը, Հ. Հովհաննիսյանը, Մ. Վարդիկյանը, Գ. Երիցյանը: Ընկերությունը մշակեց իր կանոնադրությունը և աշխատանքային ծրագիրը:

Սպիրիդոն Մելիքյանը այդ ընկերության ամենագործունյա և ամենսի-  
նկենտրոնական դեմքը դարձավ: Երաժշտական ընկերության աշխատանքների մեջ էին ներգրավված հայ պրոֆեսիոնալ երաժիշտ-կատարողներ, կոմպոզիտորներ և երաժշտագետներ, այդ թվում՝ Ա. Տիգրանյանը, Ս. Բարխուդարյանը, Գ. Սյունին, Ա. Տեր-Ղևոնդյանը, Ա. Մանուկյանը, Մ. Միրզոյանը, Հ. Տեր-Դավթյանը, ավելի ուշ՝ Ռ. Մելիքյանը, Բ. Ամիրջանը, Տ. Նալբանդյանը և ուրիշներ: Երաժշտական ընկերության ջանքերով պարբերաբար անցկացվող յառն համերգները Թիֆլիսի երաժշտական կյանքում նկատելի աշխուժություն առաջացրին: Բացի համերգներից, ընկերությունը մի շարք կարևոր նախա-  
ձեռնություններ ունեցավ: Դրանց թվում պետք է հիշատակել ուսանանների և մանկական երգերի մրցանակաբաշխությունը (1913 թ.), ապա՝ Շիրակի ազգաբարկան էքսպեդիցիան (1914 թ.), որին մասնակցեցին Ս. Մելիքյանը և Ա. Տեր-Ղևոնդյանը:

1916 թ. ընկերության վարչության հրավերով Ղրիմից Թիֆլիս մեկնեց հայ նշանավոր կոմպոզիտոր Ալեքսանդր Սպենդիարյանը: Ընկերությունը, Սպենդիարյանին Թիֆլիս հրավիրելով, նպատակ ուներ նրան ավելի սերտորեն կապել հայ իրականությանը և երաժշտական կյանքին, օգնել նրան՝ ընտրելու համապատասխան օպերային սյուժե: Թիֆլիսում Սպենդիարյանը հանգիպումներ ունեցավ Հովհաննես Թումանյանի, հայ պրոֆեսիոնալ երաժիշտների հետ, ունկնդրեց հայ ժողովրդական և աշուղական բազմաթիվ երգեր: 1916-ի մարտի 27-ին տեղի ունեցավ Սպենդիարյանի հեղինակային մեծ համերգը, որ արտակարգ ջերմ ընդունելության արժանացավ: Նույն տարվա վերջին Սպենդիարյանը երկրորդ անգամ այցելեց Թիֆլիս:

Այդ տարիներին նույնքան արդյունավետ էր և Մելիքյանի խմբավարական աշխատանքը Ներսիսյան դպրոցում: Այստեղ, նրա ղեկավարած երգչախումբը շարունակեց այն հիանալի ավանդույթները, որ կյանքի էին կոչել Մակար Եկմալյանը, ապա և Գրիգոր Սյունին: Սպիրիդոն Մելիքյանի երգչախմբային համերգներն անցնում էին բացառիկ հաջողությամբ: Մելիքյանն իր սաների հոգատար դաստիարակն էր, որ մշտապես հետևում էր նրանց երաժշտական ընդհանուր զարգացմանը: Նա չէր բավարարվում երգչախմբային փորձերով, զբոսայգիներ էր անցկացնում երաժշտական ամենատարբեր թեմաներով, սաներից առավել շնորհալիներին վարժեցնում խմբավարության արվեստին: Եվ պատահական չէ, որ Մելիքյանի լավագույն աշակերտները (Շարա Տալյան, Կ. Զա-

բարյան, Ա. Տեր-Աբրահամյան, Մ. Մազմանյան և ուրիշներ) հետագայում դարձան պրոֆեսիոնալ երաժիշտներ՝ արժանանալով լայն ճանաչման:

Ահա թե ինչպես է հիշում Մելիքյանին նրա ներսիսյանական սիրելի սաներից մեկը՝ Հայկական ՍՍՀ ժողովրդական արտիստ Շարա Տալյանը. «Ես, որպես Սպիրիդոն Մելիքյանի աշակերտ,— գրում է նա,— չեմ կարող առանց երախտագիտության խոր զգացմունքի հիշել նրա անունը: Մելիքյանը մեծապես նպաստել է իմ երաժշտական զարգացմանը: Նա ոչ միայն վառ է պահել մանկութունից իմ մեջ բուն դրած սերը դեպի երաժշտությունը, այլև առանձին մի ուժով շարունակ բողբոջել է այն՝ աշխատելով ճիշտ հունով տանել իմ երաժշտական ուսումնառությունը, օգնելով առաջադիմել ու հմտանալ կատարողական արվեստում:

Սպիրիդոն Մելիքյանն էր, որ լիովին արժանի փոխանորդը հանդիսացավ Մակար Եկմալյանի: Նրա առավելությունն այն էր, որ սիստեմատիկաբար հանդես էր գալիս խմբերգային համերգներով: Այդ տարիներին երգչախմբային արվեստը պրոֆեսիոնալ բարձրության հասավ շնորհիվ Մելիքյանի անխոնջ աշխատանքի:

Հմայիչ էր Սպ., Մելիքյանը որպես մարդ: Շատ պարզ էր ու անմիջական: Նրա այդ պարզությունը հասնում էր մանկական անմեղություն: Գուցե հենց դրանից էր այն մոգական ուժը, որով նա կախարգում և իր հետ էր կապում մեզ բոլորիս<sup>3</sup>:

Իր երգչախմբով Մելիքյանը մշտապես և սիրով պրոպագանդել է հայ ժողովրդական երգը, կատարել հայ խմբերգային երաժշտության լավագույն նրմուշները, մասնավորապես Կոմիտասի խմբերգերը, որ նրա ծրագրերում պատկանելի տեղ էին գրավում: Խմբավարի և մանկավարժի իր ծրայան աշխատանքը Ս. Մելիքյանը շթուլացրեց և շղադարեցրեց 1918—1920 թթ.<sup>4</sup> քաղաքական խառն ու լարված իրադրության պայմաններում, երբ Վրաստանում սանձազերծված էր մենշևիկյան տեռորը:

Հայաստանում սովետական կարգերի հաստատումից հետո Մելիքյանը ապրում է սկզբում էջմիածնում (1921 թվականից), ապա Երևանում (1923 թվականից): Նա դառնում է հանրապետության երաժշտական ամենակտիվ գործիչներից մեկը: Երևանի նորաստեղծ պետական կոնսերվատորիայում նա ստանձնում է խմբերգային դասարանի ղեկավարությունը, դասավանդում է տեսական առարկաներ, վարում է նաև երգեցողության դասատուների վերապատրաստման դասընթացները: Նրա ղեկավարած երգչախումբը Երևանի երաժշտասերներին ցուցադրում է իր համերգային նոր ծրագիրը, ելույթներ է ունենում նաև խառն համերգներում: 1926 թ. հունվարի 28-ին Անգրկենտգործկոմի հերթական նստաշրջանի մասնակիցների համար տրված համերգում ելույթ են ունենում Երևանի կոնսերվատորիայի կատարողական երկու կուրսի ատիվներ՝ երգեցիկ խումբը (առաջին բաժնում) և սիմֆոնիկ նվագախումբը (երկրորդ բաժնում): Սիմֆոնիկ նվագախումբը ղեկավարում էր Ալ. Սպենդիարյանը, իսկ Ս. Մելիքյանը՝ 75 հոգուց բաղկացած երգչախումբը: Մամուլը նշել է այդ համերգի բացառիկ հաջողությունը, թե՛ նվագախմբի և թե՛ երգչախմբի կատարողական գովելի մակարդակը: Այնուհետև, 1927 թ., Սպիրիդոն Մելիքյանի երգչախումբը իր համերգներով մեծ հետաքրքրություն առաջ բե-

<sup>3</sup> Շարա Տալյան, Դեպքեր, դեմքեր, մտքեր, Երևան, 1973, էջ 42—43:

րեց Մոսկվայում, ուր հրավիրված էր մասնակցելու Մեծ Հոկտեմբերի 10-ամ-  
յակի տոնակատարությանը (երգչախմբի հետ Մոսկվա էր մեկնել նաև Վ. Ա-  
րիստակեսյանի պարային անսամբլը):

Կատարողական և մանկավարժական աշխատանքին զուգընթաց, այդ տա-  
րիներին Մելիքյանն զբաղված էր երաժշտագիտական պրպտումներով, հայ  
ժողովրդական երգերի հավաքմամբ և ուսումնասիրությամբ: 1926 թ. նա դառ-  
նում է ՀՍԽՀ գիտության և արվեստի ինստիտուտի իսկական անդամ: Նա  
պարբերաբար ազգագրական էքսպեդիցիաներ է կազմակերպում Հայաստանի  
տարբեր շրջաններում՝ Կոտայք և Ախտա՝ 1926 թ., Թալին, Ապարան և Ստե-  
փանավան՝ 1927 թ., Փամբակ և Հաջիխալիլ՝ 1928 թ., Նոր Բայազետ՝ 1929 թ.,  
Թալին՝ 1932 թ.: Բացի այդ, նա ժողովրդական երգեր և պարեղանակներ է գրի  
առնում էջմիածնում ու Երևանում: Մելիքյանը հրատարակում է «Վանա ժողո-  
վրդական երգերի» երկու պրակները, «Հայ ժողովրդական երգի գամմաները»  
տեսական ակնարկը, Կոմիտասին նվիրված ուսումնասիրությունները («Կոմի-  
տասի ստեղծագործությունների անալիզը» և «Կոմիտաս» պատմական ակ-  
նարկը), աշխատում է «Ուրվագիծ հայ երաժշտության պատմության» գրքի  
վրա (այն հրատարակվել է համահուն՝ 1935-ին):

1930—31 թթ. Սպիրիդոն Մելիքյանը եղել է Երևանի պետական կոնսեր-  
վատորիայի դիրեկտորը, 1933-ին արժանացել հանրապետության արվեստի  
վաստակավոր գործչի պատվավոր կոչման: Նա վախճանվեց 1933 թ. մայիսի  
4-ին, կյանքի 53-րդ տարում:

\* \* \*

Սպիրիդոն Մելիքյանի երաժշտական գործունեության բոլոր կողմերը,  
նրա կատարողական, ստեղծագործական և գիտական հետաքրքրությունները  
անխզելիորեն կապված են եղել հայրենի երաժշտության, հայ ժողովրդական  
երգի հետ: Որպես ստեղծագործող նա մշակել է հայ ժողովրդական երգի նը-  
մուշներ, որպես մանկավարժ ձգտել է դպրոցում լայն տեղ տալ ժողովրդական  
երաժշտությանը, որպես խմբավար և երգիչ մշտապես պրոպագանդել է իր  
ժողովրդի երգարվեստը, որպես ազգագրագետ շարունակել է Կոմիտասի սկսած  
գործը երաժշտական ֆոլկլորի հավաքման ու ձայնագրման ուղղությամբ, որ-  
պես երաժշտագետ ուսումնասիրել է հայրենի երաժշտական արվեստի անցած  
ճանապարհը, փորձել է բնութագրել ազգային երաժշտական մշակույթի էու-  
թյունն ու առանձնահատկությունները:

Դժբախտաբար նրա երաժշտագիտական աշխատությունները զերծ չեն  
եղել մոլորություններից ու ափսոսանքի արժանի սխալներից: Դրանք արտա-  
հայտվեցին օտար ազդեցությունների մասին Մելիքյանի ունեցած սխալ պատ-  
կերացումների մեջ, ինչպես և, արդեն սովետական տարիներին՝ երաժշտական  
մի շարք երևույթների վուլգար-սոցիոլոգիական լուսաբանման մեջ: Բայց այ-  
դուհանդերձ, անկարելի է ժխտել, որ այն ամենը, ինչ զբաղեցրել է Մելիքյա-  
նին երկար տարիների ընթացքում, թելադրված է եղել նրա բարենպատակ  
ձգտումներով, հայ երաժշտական արվեստին ծառայելու, նրա առաջադիմու-  
թյանը նպաստելու անկեղծ ցանկությամբ:

Վաղ հասակից Մելիքյանը սիրել է հայրենի ժողովրդական երգը: Այս  
սերն էլ նրան սկզբից մինչև վերջ ոգեշնչել և անխոնջ աշխատանքի է մղել: Թի

որքան խորն է եղել հայ ժողովրդական երգի նկատմամբ Մելիքյանի գործա-  
լից սերն ու հետաքրքրությունը մենք տեսնում ենք նրա հետևյալ ասույթից-  
«Ես, որ եվրոպական ազգերի ժողովրդական երգերով բավական զբաղվելու  
առիթ եմ ունեցել և հաճախ եմ համեմատության դրել հայկականի հետ, այն  
եզրակացության եմ եկել, որ հայը իր ժողովրդական երգերով ամենափայլուն  
տեղերից մեկն է գրավում նրանց շրջանում և պատվով կարող է չափվել նրանց  
հետ: Չափազանցություն արած չեմ լինի և ազգային զգացմունքը շոյած, եթե  
ասեմ, որ այդ ազգերի մեջ մի երգ չգտա, որ այնքան խոր վիշտ արտահայտեր,  
որքան մեր «Միրտս նման էր» երգը, և այնպիսի՝ իր կազմովյամբ գեղարվես-  
տական զարգացման հասած, երգ չտեսա նրանց մոտ, ինչպես մեր լոռեցու  
«Հորովել»-ն է»<sup>4</sup>:

Անդրադառնալով հայրենի ժողովրդական երաժշտության գեղարվեստա-  
կան արժեքին, նրա ճանաչողական և դաստիարակչական նշանակությանը,  
Մելիքյանը շեշտում էր ժողովրդի ընդերքում պահպանված երաժշտական  
գանձերի հավաքման, լայն ուսումնասիրման և շարունակական պրոպագանդա-  
յի անհրաժեշտությունը: «Մենք այն կարծիքին ենք, — գրում էր նա, — որ մեր  
մատաղ սերնդի ականջին ժողովրդական երգը որքան շատ հնչի, այնքան լավ,  
որովհետև այդպիսով միջոց տված կլինենք նրան՝ գիտակցորեն թե անգիտակ-  
ցորեն, հայի ստեղծագործության ինքնուրույն գծերն ըմբռնելու և սիրելու»<sup>5</sup>:

Մելիքյանի՝ հայրենասեր արվեստագետի թողած ազգագրական պատկա-  
ռելի ժառանգությունը վկայում է, թե նա որքան նվիրված է եղել հայրենի ե-  
րաժշտական մշակույթի շահերին: Դեռևս 1917-ին Թիֆլիսում լույս տեսավ  
Ս. Մելիքյանի և Ա. Տեր-Ղևոնդյանի կազմած արժեքավոր ազգագրական ժո-  
ղովածուն՝ «Շիրակի երգեր» վերնագրով: Նախատեսվածական տարիներից այդ  
ժողովածուն բացառիկ նշանակություն ձեռք բերեց հայ երաժշտության զար-  
գացման ճանապարհին, հանդիսանալով ազգագրական հավաստի մի աղբյուր,  
որից հաճախ են օգտվել հայ կոմպոզիտորները՝ իրենց ստեղծագործական  
տարբեր հղացումներն իրականացնելու ընթացքում: Բավական է հիշել, որ այդ  
ժողովածուի նյութերից 10-ից ավելի գրառումներ է օգտագործել Ալ. Սպեն-  
դիարյանը՝ իր «Ալմաստ» օպերայում:

«Շիրակի երգերը» լույս տեսան այն ժամանակ, երբ կոմիտասյան ազգա-  
գրական գրառումները դեռևս հրատարակում համարյա չկային, ուստի մինչև  
Կոմիտասի առաջին ժողովածուի հրատարակումը (1931 թ.) «Շիրակի երգե-  
րը» տպագրված միակ լիարժեք ազգագրական ժողովածուն էր մեզանում: Այն  
պարունակում է 152 գրառում: Ժողովածուի նյութը հավաքվել է Շիրակի գյու-  
ղերում, 1914 թ. հուլիս-օգոստոս ամիսներին: Երգերի նոտագրումը կատարել  
է Ս. Մելիքյանը. բացի այդ, նա գրել է ժողովածուի առաջաբանը՝ համառոտ  
տեղեկություններ տալով էթնոպոզիցիայի մասին: Մելիքյանն այստեղ նշում է,  
որ ձայնագրված նյութը եզակի մի աղբյուրից չի բխում, այլ ներկայացնում է  
թե՛ բնիկների և թե՛ Մուշից, Ալաշկերտից, Կարսից, էրզրումից այստեղ գաղ-  
թած հայերի երաժշտական ֆոլկլորը: Մինիատյուրային հին ու նոր պարերգե-  
րի հետ մեկտեղ այս ժողովածուում տեղ են գտել բուն երգային նմուշներ, ինչ-  
պես և աշուղական եղանակներ: Ըստ որում, այստեղ աշուղական եղանակները

<sup>4</sup> Ս. Մելիքյան, Երաժշտության զարգացման խնդիրը մեզանում, Թիֆլիս, 1909, էջ 38:  
<sup>5</sup> Նույն տեղում, էջ 30:

կամ խաղերը փաստորեն առաջին անգամ են այդպիսի լայն ընդգրկումով ներկայացվում: Եվ դա, անշուշտ, կարևոր մի քայլ էր հայ երաժշտության այդ ինքնատիպ ճյուղի ուսումնասիրման ճանապարհին:

Ս. Մելիքյանի հետագա նախաձեռնությունը «Վանա ժողովրդական երգերի» երկու պրակների հրատարակումն էր 1927—28 թթ. (այս ժողովածուի համահեղինակն էր Մելիքյանի աշակերտ Գ. Գարդաշյանը): Ի տարբերություն նախորդի, այս ժողովածուն ներկայացնում էր ազգագրական միայն մի շրջանի՝ Վանի ու նրա շրջակայքի երգերն ու պարերգերը: Այստեղ առանձնապես հետաքրքրական են հին ժամանակներից եկող պարերգերը, որ աչքի են ընկնում ազգային ինքնատիպ բնութագծերով, լադային ուրույն կառուցվածքով:

Սովետական տարիներին մեր հանրապետության տարբեր շրջաններում Մելիքյանի կատարած ազգագրական գրառումները հրատարակվեցին նրա մահից հետո՝ երկու հատորից բաղկացած «Հայ ժողովրդական երգեր և պարեր» ժողովածուում (1949 և 1952 թթ.), Ս. Աղայանի խմբագրությամբ: Այս սովոր ժողովածուն, որ պարունակում է 533 գրառում, լայն պատկերացում է տալիս 1920-ական թթ. մեր կենցաղում պահպանված գեղջկական երաժշտական ֆոլկլորի մասին: Ժողովածուում ներկայացված են այսպես կոչված «օբյեկտիվ ֆիքսացիայի» սկզբունքով գրի առնված ժողովրդական երգարվեստի հիմնական ժանրերը՝ աշխատանքային, ծիսական, հարսանեկան, վիպական, սիրային-լիրիկական, օրորոցային և այլ բնույթի երգեր, բազմազան պարերգեր, դործիքային երաժշտության արժեքավոր նմուշներ (ծանր գյուղի տարբեր տիպեր, քոչարիներ և այլն), աշուղական հին ու նոր եղանակներ: Ժողովածուի նյութերի մեջ շատ ուշագրավ են սասունցիների հինավուրց և ինքնատիպ պարերգերն ու պարեղանակները:

Իր էքսպեդիցիանների ընթացքում Սելիքյանը զարմանալի հետևողականությամբ և ջանասիրությամբ տարեցտարի հարստացրել է հայ երաժշտական ազգագրության ֆոնդը, այդ աշխատանքում հաղթահարելով շատ ու շատ գրավարություններ: Նրա ազգագրական եռանդուն գործունեությանն է իր հուշերում անդրադառնում ակադեմիկոս Կ. Մելիք-Օհանջանյանը: Նա գրում է. «Նվիրելով իր եռանդն ու գիտությունը հայ ժողովրդական երգ-երաժշտության հավաքման, ձայնագրման և ուսումնասիրության աշխատանքներին, Ս. Մելիքյանը մի շարք տարիների գիտարշավների ժամանակ հավաքեց, ձայնագրեց հազարից ավելի երգ-եղանակներ: Այս բնագավառում նա Կոմիտասից հետո մրցակից չունի: Ինչպե՞ս էր սիրում նա մեր երաժշտական ֆոլկլորը, ի՞նչ ոգևորությամբ էր շահլիփում մեր գավառներն ու շրջանները, գյուղերն ու ավանները: Գյուղից գյուղ էր անցնում, սարեր, ձորեր կտրում, համարյա միշտ ոտքով, մի ցուպ ձեռքին, նոտատետրերը, անհրաժեշտ պիտույքներն ու պարագաները շալակին... Հարյուրավոր կիլոմետրեր է կտրել, միայն թե իր նպատակին հասնի, «հետաքրքրական հունձ» անի: Գիտարշավների ժամանակ նա մի առանձին ոգևորություն էր ապրում: Դա նրա համար և՛ հանգիստ էր, և՛ սրբազան պարտականություն, և՛ հաճույք: Թե որքան ծանր պայմաններում է նա կատարել իր այդ հասարակական-հայրենասիրական պարտականությունը, — այդ ամենը գիտեն միայն սակավաթիվ մարդիկ, նրա մտերիմները»<sup>6</sup>:

6 Ս. Մելիքյան, Հոգևածներ, հուշեր, նամակներ, փաստաթղթեր, էջ 87:



Քարձր գնահատելով Կոմիտասի և Սպիրիդոն Մելիքյանի թողած ազդարարական ժառանգությունը, պրոֆ. Ք. Քուչնարյանը իր «Հայ մոնոդիկ երաժրշտության պատմության և տեսության հարցեր» կապիտալ աշխատության մեջ հետևյալն է ասում. «Հայ գեղջուկ երգի հիմնական հարստությունները հավաքված են Կոմիտասի և Սպիրիդոն Մելիքյանի՝ երաժշտական ֆուկլորի այդ երկու անխոնջ հետազոտողների աշխատություններում»<sup>7</sup>:

Այս բոլորի հետ մեկտեղ Մելիքյանը հայ իրականության մեջ ճանաչված և գնահատված կոմպոզիտոր էր. որի գործերը ինքնատիպ են իրենց մտահղացմամբ և կրում են հեղինակի ստեղծագործական անհատականության զորոշմը: Նա երգեր և ողբերգություններ է գրել Ավ. Իսահակյանի և Հովհ. Հովհաննիսյանի բանաստեղծական տեքստերի վրա, հորինել «Գառնուկ ախպեր» մանկական երաժշտական պատկերը, մշակել է բազմաթիվ ժողովրդական երգեր՝ մեներգչի և երգչախմբի համար: Նրա «Ախթամար» սոնետ-սերիալը պոեմը այդ ժանրում ստեղծված երկրորդ գործն է հայ իրականության մեջ՝ Եկմալյանի «Ռոզա» կանտատից հետո: Հանիրավի մոռացված այդ պոեմը ներկայացնում է գեղարվեստական անվիճելի արժեք և կարող է արժանի տեղ զբաղեցնել այժմյան կատարողական երկացանկում: Առավել ժողովրդականություն են վայելում Մելիքյանի գրած հնչեղ և տպավորիչ խմբերգերը՝ «Ծամթելը», «Պիլիպին», «Թխկոնդան», որոնց մեջ հիանալիորեն է արտացոլված հեղինակի ստեղծագործական իսկական վարպետությունը: Դրանք պատկանում են հայ խմբերգային գրականության լավագույն նմուշների թվին:

1932 թ. իր աշխատանքային ծրագրում Սպիրիդոն Մելիքյանը նախատեսել էր գրել ժողովրդական բնույթի մի կանտատ՝ նվիրված Մեծ Հոկտեմբերի 15-ամյակին: Բայց ծանր ու անբուժելի հիվանդությունը նրան զրկեց իր մտահղացումն իրականացնելու հնարավորությունից:

Սպիրիդոն Մելիքյանը լայն ժողովրդականություն վայելող մեր բազմափաստակ երաժիշտներից էր, ջերմորեն սիրված ու հարգված մարդ, որ իր ուրույն տեղն ունի հայ երաժշտության պատմության մեջ:

### СПИРИДОН МЕЛИКЯН

(К 100-летию со дня рождения)

А. Г. ТАТЕВОСЯН

(Резюме)

Начало многосторонней деятельности Спиридона Меликяна—старшего ученика Комитаса, одного из создателей армянской профессиональной музыки, относится к первым годам XX в. По примеру своих предшественников М. Екмаляна, Кара-Мурзы, Комитаса С. Меликян

<sup>7</sup> X. Кушнарев, Вопросы истории и теории армянской монодической музыки, Т., 1958, стр. 4.

был универсальным музыкальным деятелем, проявив себя как этнограф и композитор, хормейстер и певец, музыковед и педагог. В дореволюционный период Меликян работал в Тифлисе. Он основал там армянское музыкальное общество, руководил хором семинарии Нерсисян. Концерты хора Меликяна пользовались исключительным успехом. После установления Советской власти в Армении С. Меликян переезжает сюда и ведет плодотворную педагогическую, исполнительскую и научную работу, руководит хором Ереванской консерватории, периодически организует этнографические экспедиции в районы республики. Меликян был крупным знатоком армянского музыкального фольклора, продолжателем дела Комитаса в собирании и записи сокровищ армянской народной музыки. Его этнографические сборники («Ширакские песни», «Ванские народные песни», «Армянские народные песни и танцы») представляют большую художественную и научную ценность. Меликян-композитор известен как автор ряда обработок для хора и сольного пения. Особенно популярны его хоровые песни «Цамтел», «Пилини», «Тхконда».